

- प्रधानमंत्री नरेन्द्र मोदी रो काल राख्या जावण वाळा रोजगार मेळां मांय 51 हजार ऊं बत्ता नौजवानां ने नौकरी लागण रा कागजात संपण रो कार्यक्रम।
- बारां जिला री अंता विधानसभा सीट माथे उपचुनाव सारू दाखिल करी ज्या नामपाना री जांच मांय एक पर्चा रद्द करी ज्यो।
- रेल मंत्री अश्विनी वैष्णव त्यौहारी सीजन रे दौरान चलायी जावण वाळी खास रेलगाडियां रा हालात रो जायजो लीनो-मोटी तादाद मांय पूगण वाळा मुसाफिरां रा प्रबंधन सारू वॉर रूम बणायी ज्या।
- राजस्थान राष्ट्रीय पोषण माह रा तैत बेहतरीन काम रे पाण देश मांय दूजी ठौड़ माथे रह्यो।

000

प्रधानमंत्री नरेन्द्र मोदी रो काल वीडियो कॉन्फ्रेंस रे मार्फत देश मांय 40 ठौड़ां 51 हजार ऊं बत्ता नौजवानां ने नौकरी लागण रा कागज देवण रो कार्यक्रम है। प्रधानमंत्री ई मौके नुवी नौकरी लागण वाळां ने सम्बोधित ई करेला। न्यारा-न्यारा राज्यां मांय व्हेवण वाळा कार्यक्रम मांय केन्द्रीय मंत्री ई मौजूद रहवेला। राज्य रा खास शहरां मांय ई रोजगार मेळा लगाया जावेला। जयपुर मांय राख्या जावण वाळा कार्यक्रम मांय केन्द्रीय कृषि अर किसान कल्याण राज्यमंत्री भागीरथ चौधरी खास पावणा रा तौर ऊं मौजूद रहवेला। ओ मेळो डाक विभाग रा राजस्थान परिमंडल री ओर ऊं राख्यो जावेला।

000

बारां जिला री अंता विधानसभा सीट माथे व्हेवण वाळा उपचुनाव सारू कांग्रेस री उम्मीदवार उर्मिला जैन रो पर्चा रद्द व्हे ग्यो है। ई पाछे अब चुनाव मैदान मांय बीस उम्मीदवार बच्या है। रिटर्निंग अधिकारी हवाई सिंह यादव बतायो के उर्मिला जैन रा नामपाना मांय केवल एक ही प्रस्तावक व्हेवण रे कारण वां रो पर्चा रद्द कर दियो ज्यो। ई पाछे उपचुनाव मांय अब प्रमोद जैन ई कांग्रेस रा अधिकृत उम्मीदवार व्हेला।

000

बैंकिंग संशोधन कानून रा तैत नॉमिनी बणावण ऊं जुड़्या खास प्रावधान एक नवम्बर ऊं लागू व्हेला। ई रा तैत अब ग्राहक चार जणां ने नॉमिनी बणा सकेला। बैंकिंग संशोधन कानून रो मकसद बैंकिंग हलका मांय शासन मानकां ने मजबूत करणो अर जमा करावण वाळां री तादाद बधावणो है।

000

पैली वाळा उपराष्ट्रपति अर राज्य रा पैली वाळा मुख्यमंत्री भैरोंसिंह शेखावत ने आज वां री जयंती रे मौके सिरधाभाव सागे याद कर्या जा रह्या है। मुख्यमंत्री भजनलाल शर्मा जयपुर मांय विद्याधर नगर रा स्मृति स्थल माथे बाबो-सा री मूरत माथे फूल चढ़ा र वां ने याद कीना। ई मौके श्री भजन लाल शर्मा खबरनवीसां सागे बातचीत करता थकां कहयो के भैरोंसिंह जी हमेशा राष्ट्रवाद री भावना ऊं देश अर प्रदेश री मजबूती सारू काम कीनो। पाली मांय भारतीय जनता पार्टी रा कार्यकर्ता भैरोंसिंह शेखावत री तस्वीर माथे फूल चढ़ र वां रा आदर्श ने आगे बधावण रो संकल्प लीनो।

000

महावीर चक्र ऊं नवाजी ज्या ब्रिगेडियर सवाई भवानी सिंह री मोम ऊं बणायी ज्यी मूरत रो आज ब्रिगेडियर सवाई भवानी सिंह री बेटी अर राज्य री उपमुख्यमंत्री दिया कुमारी जयपुर रा वैक्स म्यूजियम रा रॉयल दरबार' सेक्शन मांय अनावरण कीनो। ब्रिगेडियर सवाई भवानी सिंह री जयंती रे मौके राखी ज्या कार्यक्रम मांय वां री बहादुरी ऊं जुड़ी खास फिल्म ई बतायी ज्यी। ई मौके उपमुख्यमंत्री दिया कुमारी कह्यो के आ मूरत वां रा पिता जी कानी ऊं करीजी देश सेवा अर हिम्मत रो संदेश हर एक जणा ताई पूगावेला।

000

दुनियाभर मांय नामी पुष्कर पशु मेळा मांय हाल ताई मोटी तादाद मांय ऊंट अर घोड़ा बिक्री सारू पूगण लाग्या है। पशुपालकां सारू हेल्प डेस्क अर ऑनलाइन प्लॉट बुकिंग रो सुबीतो मुहैया करायी ज्यो है अर हाल ताई 417 प्लॉट ऑनलाइन तरीका ऊं आवंटित कर दिया ज्या है। म्हाणी अजमेर खबरनवीस बतायो के मेळा मांय देशी-परदेशी सैलानी ऊंट री सवारी करण अर फोटो खिंचावण रो मजो ले रह्या है।

000

पुष्कर पशु मेळो 6 नवंबर ने व्हेवण वाळा महास्नान सागे पूरो व्हेला।

000

रेल मंत्री अश्विनी वैष्णव त्यौहारी सीजन रे दौरान चलाई जावण वाळी खास रेलगाडियां ऊं जुड्या हालात रो आज नई दिल्ली मांय जायजो लीनो। वे अहलकारां सागे छठ पूजा ऊं पैली रेलवे री तैयारियां रो जायजो लीनो। ई दौरान श्री वैष्णव कह्यो के त्यौहारां रे दौरान रेलवे टेशनां माथे पूगण वाळा मुसाफिरां री मोटी तादाद ने ध्यान राखता थकां वॉर रूम बणायी ज्या है।

000

रेलवे आवता चार दिन मांय नियमित गाडियां रे अलावा डोढ़ हज़ार खास गाडियां चलावेला।

000

प्रदेश रा केई जिला मांय आस्था रा महापर्व छठ पूजा री तैयारियां ज़ोरां माथे चाल रही है। सूरज री पूजा रा ई पर्व रे मौके छठ घाटां री साफ-सफाई अर सजावट करी जा रही है। पाली मांय बिहारी छठ घाट ने संवार्यो जा रह्यो है। बिहारी घाट सांस्कृतिक समिति रा अध्यक्ष अनिल कुमार सिंह बतायो के छठ पूजा सारू श्रद्धा अर आस्था रा केंद्र ई घाट माथे लोग जगह-जगह खुद रो नाम मांड र पूजन री ठौड़ तैय कर रह्या है।

000

दीवाळी रा त्यौहार रा तैत भाईदूज आज रीत मुजब मनायी जा रही है। ई मौके प्रधानमंत्री नरेन्द्र मोदी जनता ने शुभकामनावां देता थकां सोशल मीडिया पोस्ट रे ज़रिये भाई-बहन रा रिश्ता ने और मजबूत बणावण री कामना कीनी। मुख्यमंत्री भजन लाल शर्मा ई प्रदेश री जनता ने भाईदूज री शुभकामनावां दीनी है। भाईदूज रे मौके बहना भाइयां रे तिलक काढ़ र वां री लम्बी उम्र अर सुख-समृद्धि री कामना कर रही है। सवाईमाधोपुर, पाली, अजमेर, बाड़मेर अर ब्रज हलका रा भरतपुर मांय ई ओ पर्व रीत मुजब मनायो जा रह्यो है। भरतपुर री जेल मांय ई बहनां भाइयां ऊं मिलण सारू पूगी। भाईदूज रे मौके करौली समेत केई ठौड़ां रेलां-मोटरां मांय भीड़ निजर आयी।

000

दीपावली रे मौके लंबी छुट्टियां रे कारण सवाईमाधोपुर रा रणथम्भौर नेशनल पार्क मांय मोटी तादाद मांय सैलानी पूग रह्या है। म्हाणा खबरनवीस बतायो के सफारी बुकिंग ऊं ले र होटलां ताई सैर-सपाटा ऊं जुड्या हर कारोबार मांय तेज़ी आयी है।

000

राजस्थान राष्ट्रीय पोषण माह रा तैत बेहतर काम सारू देश मांय दूजी ठौड़ माथे रह्यो है। उपमुख्यमंत्री और महिला अर बाल विकास मंत्री दिया कुमारी ई सारू महकमा रा अहलकारां अर कर्मचारियां ने बधाई दीनी है। महकमा रा शासन सचिव महेन्द्र सोनी बतायो के प्रदेश 81 लाख रा लक्ष्य रे मुकाबले 88 लाख ऊं बत्ती उपलब्धियाँ हासिल कीनी। राजस्थान लक्ष्य ऊं 14 फीसदी बत्ती सफलता हासिल कीनी। गुजरात 115 दशमलव 74

फीसदी कामयाबी सागे अव्वल रह्यो। राष्ट्रीय पोषण माह रा तैत 'वोकल फॉर लोकल', मोटापा ने कम करण अर शक्कर-तेल कम काम लेवण सरीखा मुद्दा माथे खास ध्यान दियो ज्यो। इण ऊं पैली राजस्थान, राष्ट्रीय पोषण पखवाड़ा अर प्रधानमंत्री मातृ वंदना योजना रा तैत शानदार काम सारु देश मांय अव्वल रह्यो हो।

000

शिक्षा मंत्री मदन दिलावर कह्यो है के विद्यार्थियां रो पूरो विकास शिक्षा रा मंदिरां मांय ई व्हे सके है। वे बालोतरा जिला रा सिणधरी मांय राख्यी ज्या एक कार्यक्रम मांय बोल रह्या हा। श्री दिलावर कह्यो के स्कूल केवल पढ़ाई री ठौड़ नी है बल्कि संस्कार, सेवा अर देशभक्ति री भावना जगावण रा केंद्र व्हे है। कार्यक्रम मांय उद्योग राज्यमंत्री के.के. बिश्नोई, पैली वाळा केन्द्रीय मंत्री कैलाश चौधरी अर विधायक मीर सिंह ई मौजूद हा।

000

राष्ट्रीय मानवाधिकार आयोग—एनएचआरसी 19 राज्यां अर केंद्र रा राज वाळा 4 प्रदेशां ने सिंयाळा रे दौरान लोगां ने घणी ठण्ड ऊं बचावण सारु जरूरी जतन करण बाबत् कह्यो है। शीत लहर रे कारण साल 2019 ऊं 2023 बीचे तीन हजार छह सौ उनतीस जणा री मौतां रो जिकर करता थकां आयोग संबंधित अहलकारां ने संवेदनशीलता सागे काम करण बाबत् कह्यो।

000

नवीन अर नवीकरणीय ऊर्जा मंत्रालय राष्ट्रीय हरित हाइड्रोजन मिशन— एन.जी.एच.एम. रो पहचान चिन्ह बणावण री होड़ राखेला। मंत्रालय रे मुजब जीतण वाळा ने एक लाख रुपया रो नकद ईनाम दियो जावेला। पहचान चिन्ह रो डिजाइन देश ने खुद रे पाण ऊबो करण अर हरित हाइड्रोजन रा उत्पादन, काम लेवण अर भारत ने इण रा निर्यात रो वैश्विक केंद्र बणावण रा मिशन रे मुजब व्हेवणो चाहिजे। होड़ सारूँ 5 नवम्बर ताई माई जीओवी पोर्टल रे जरिये डिजाइन जमा कराया जा सके है।

000